

山雲樓文鈔

郭柏蔭題籤

伯瀛

岷雲樓文鈔卷十一

閩縣劉存仁炯甫箸

與高雨農先生書

庚子十一月

雨農老伯大人盛明府隔光儀經年累月心旌眷戀靡日不
思蓋道氣之感否秋岷浹於胸臆間而不能去伏維道體綏
和康疆逢吉爲言之踈偶與常南陔觀察述及鉅人長德並
讀大箸韓文故傾倒折服因屬光澤盛明府先爲道達誠意
維時存仁附上一緘述觀察欽佩意而盛明府不體尊賢雅
意回書竟不題及未知前書得徹左右否秋岷民世兄來省
鄉試匆匆未及奉書而情之淺深不在言之踈數也頃者友

人張欽臣名肇修秉鐸貴邑以長者不鄙存仁欲得一言爲介紹願進謁於大君子之前張君博學負奇氣善屬文辛卯歲同居時存仁病幾殆張偕溫松雲診治得活自是結爲性命交此曩日所親見者也喜乘其便謹薰沐仰千於執事焉伏念先君子孝友有隱德不孝孤薄德無似不能闡揚先烈咎戾滋多茲以重修家譜彙撰先傳以示來茲謹撰先考行述一篇呈覽伏冀哀其遇而憫存仁之志篤念寒微俯如所請賜之銘傳以光泉壤是先君困阨於生前猶得託有道立言之君子以表彰於身後則存仁等世世子孫感且不朽曩者相依四載屢以爲言辱蒙俞允祇以貧不克葬未敢乞銘

夙夜疚心不勝飲泣今窀穸已營且當吾世而得遇大賢素
叨教誨若復濡滯而不知匍匐乞請是重存仁之罪也舍間
自家慈以下均安善三月間治先塋始克奉生嗣祖父母暨
先君安葬摒擋成禮神力交瘁嗣有同祖兄之喪復爲經營
伯父母葬事以完未了之緒遺孤八口待以舉火一介寒儒
食指數百特以義無可辭竭力負重境日累而學日荒不能
振拔以自見於世以有用之精力爲人事輾轉所拘迫恐終
隳於廢棄之歸回憶曩日之眷注所期許者何若日月其脩
修名不立時世多艱能無廢書三歎邪不知長者其何以教
之臨書惓惓不盡欲言再今春簞仙外舅暨同祖兄壽海均

遊道山松雲亦溘逝愴念舊遊不勝今昔之感附瑞竹亭圖
記賜削某頓首

此書達到先生於辛丑春正月答書批還行狀及瑞竹亭
稿閏三月三日先生仙逝聞其易簀前數日撰先贈公墓
誌銘及常觀警答書未寄詢其家人匆遽中以爲未撰恨
求銘太遲不勝懊悔同治癸酉其孫翰臣拔萃聯秋捷帶
來抑快軒全稿丙集中有先考墓誌銘始嘆長者不違所
請悲感何極

同治甲戌
存仁自記

先考行述 庚子

先考諱廷章字建綸號芸圃行七先世由福州懷安之鳳岡轉徙平湖至曾祖國學生諱以任公始居郡治祖國學生諱振謙公寬厚長者多隱德父贈登仕郎諱則康公嗣父贈登仕郎諱則矩公康公兄弟五矩公居季素友愛無間言故先考出爲矩公後從叔廷煥四叔祖則華公季子也亦後矩公故矩公有嗣子二而先考爲長伯父廷佐公康公出也於先考爲同懷兄幼棄儒習賈俾先考就學康公卒貧益不支先考念無以爲養感憤棄舉子業幕遊與兄廷佐同養母陳太孺人而事兄嚴且敬曲盡弟道蓋是時名爲矩公後居處寢

食實依所生也康公卒後之六年歲壬戌而矩公卒先考方壯遊聞訃匍匐奔喪擗踊哭泣盡哀盡禮卒之日家無遺貲逋負纍纍喪殯之費餽粥之需手捃口瘡經營良苦矣迎奉嗣母陳太孺人與本生繼母同起居菽水承歡竭力奉養時吾母沈孺人年二十五始來歸我先考甫入門奉侍生嗣兩姑唯謹得兩姑歡先考仍別母出遊戀戀不忍去母子間食貧離別之苦有不堪述者存仁幼侍本生繼祖母及嗣祖母爲述先考壯年蹇困狀嘗以病留滯旅邸數月不得歸輾轉寓書不敢以病告恐貽老親憂病已復就館其諱日泣憶句云不敢高聲哭恐傷慈母心九日看菊云但願彼蒼添紀算

年年籬下看秋芳。可以想其孝思之篤。出門拜別云。跽聽慈親含淚教吾兒。貧莫受人憐。戲咏牢丸云。匕箸休存諸俗想。此身已是媚人難。可以想其風骨之峻。頻年憂患家多外侮。劬勞跋扈言之傷心。同母女弟一適王氏。嗣母女弟一適林氏。睚眦有無常。以奩貲薄贈爲歉。旣以母老不樂遠遊。歸里爲人掌書記。兼治鹽筴。歲入稍裕。自是老親始無薪水憂。有以千金聘入幕府者。堅辭不受。曰。吾晨夕得侍菽水。吾心安矣。他不願也在幕數年。兼精申韓度支之學。歸裝手稿盈篋。已而封庋不用。謂吾少貧廢業。思習經濟。以自見。使精神才坐付銷沈。不由科弟。以顯吾之憾也。曩汝祖望我切。今以屬

汝汝曹其勉之性穎悟明敏精力過人襄鹵務持大體遇事可否不兩言立決理明詞達處分部署人人各愜其意以去故爭出重聘延致常早出暮歸溫清老母侍立承歡疴癢抑搔如童穉視顏稍不愜必嚴詰兒女輩必有不當意事失老親歡必容霽乃已存仁少時食寢從繼祖母陳太孺人親見孺慕愛日之誠曲體微不至真可謂視於無形聽於無聲者矣侍親既退出治書札叢疊委積手自裁答恆至午夜不休工楷法代勞者不及亦不允也以是晝夜操勞而精力日以消耗矣治家嚴肅內外井井不惡而嚴時伯父出遊先考獨任家事視姪猶子延明師課讀不惜重聘尊禮若不及待子姪

嚴舉動步趨必以禮不衣冠不敢見存仁年六歲就傅甲戌
年十歲學爲制舉文從諸兄後每呈課藝許可則色霽不當
則長跼受教督責不少假未嘗以少故而怠之至今猶彷彿
耳提面命時也嗜學不倦善疆記暇輒手一編以自娛讀書
得大意提要鉤元議論精核尤好先正格言夜闌讀罷召子
姪輩環立侍聽訓以立身行己之方處世接物之道以孝弟
爲根本以忠恕爲存心學以裕才之基勤以補質之拙吾子
孫有能孝弟忠信者方不墜清白家風豈徒呻其佔畢習爲
詞章以獵取科名而已哉僉唯唯聽命素闊達大度人憚其
剛正及久與之習則春風藹然如飲醕醪令人自醉所交多

方聞有道之士少遊趙溥堂士泉林東時兆泰之門爲兩先生所器重同列咸折服比壯旣廢業或勸先考曰以君之文章練達才識明敏可以出而仕矣古人納貲爲郎亦足以不負所學焉能鬱鬱久居此乎先考蹙其言屈於貲而不果又虛己善聽言慷慨敦氣誼喜與人爲善誘掖獎勸言必由中必誠必信卒後數十年故人猶稱頌不置非有德入人之深者能如是乎輕財好施力不足則委曲以求濟歲饑鄉人有鬻女爲婢者廉得其實首倡十金鳩同好得數十金贈之俾母女復完後爲士人妻歲丁丑遭嗣母陳太孺人之喪殯喪哀毀盡禮人稱其孝女弟王氏孀而貧體生母意饋問不絕

挈其孤使就塾女甥迎於家待母太孺人及笄爲擇壻出百金備奩資嫁遣之曰向家貧無以贈妹女甥爲妹出今以補吾所不逮也中年兄弟離多會少友愛彌篤念母春秋高思見曾孫急爲長姪慶祺完娶時則一室之內肅肅雍雍歡洽無間日敘天倫之樂而已以父康公辛未年葬后賢山而嗣父矩公未葬爲隱憂日走荒山相度吉壤未果而病作嘗自嘆曰日者言吾今歲不利中年體素豐近漸羸弱頗不支多痰嗽氣復上湧飲食僅勝杯勺性又薄滋味食少事繁其能久乎顧無可代者幸甥姪婚嫁已畢了此心願此呱呱者方在抱矣吾兒女之婚嫁成立未知吾能及見否乎已卯春患

山雪樓文集
肺氣不調動息作喘比稍間月餘復力起治事至四月轉劇喘急不安寢不安席蓋積勞所致也醫者以怯弱不敢投峻補體愈憊神愈困氣愈奔經數晝夜不能仰臥不孝存仁等方穉昧不諳醫理奉侍無狀終天之痛百身莫贖竟於閏四月廿七日巳時棄養矣病革囑吾母曰吾他無所憾吾方中身吾兄遠出吾不獲終養吾母爲痛汝善事吾母勿悲也指不孝存仁曰兒年最長家無遺產典鬻盡繼之以貸俾之力學尙可支數年以兒二十歲爲度學不成廢業可也幼者吾不及知且顧不孝曰汝好爲之勿自棄以隳先志諸孤皆環泣受教言已喘急不休已謂王氏姑曰妹苦節可憫可敬兄

卒後善事母汝嫂善同甘苦饘粥共之妹勿慮也家人皆泣
易簣之日晨起誦五指峰詩一遍清朗如平時舅氏沈鈍夫
先生方在座詢之亦不言其故素嫻吟咏所存陔華賸草一
卷皆少作多發自天性云嗚呼痛哉先考奮勵力學屢挫而
不損其志孳孳爲善勉爲完人僅及中壽不幸不致身通顯
綿綿延延以佑啓我後人不孝存仁等薄德無似不能修身
立名顯揚以承先志至今尙困一氈窮愁潦倒懼自墜於廢
棄而不自振拔飲泣椎心罪何可追詩曰夙興夜寐無忝爾
所生又曰明發不寐有懷二人誦之有餘痛焉願與諸弟共
勉之所幸依倚老母株守里門未嘗一日離膝下吾母善食

貧歲入修脯節縮以備嫁娶今兩弟壯有室矣惟季弟未聘
宜何如勤勤愛日孜孜劬業進德及時互相砥礪以相與有
成毋背我先人之遺訓哉顧念先考厚德不孝存仁早孤闇
昧淺陋不文無以臚操行之萬一且多缺畧不備謹誌梗概
以示來者庶不至文獻之無徵若夫恢揚先烈則猶有待而
不敢自信耳先考卒於嘉慶二十四年己卯閏四月廿七日
巳時距生於乾隆三十九年甲午三月十二日丑時享年四
十有六卒後二十一年爲道光二十年庚子四月廿五日申
時孤子存仁等始克葬公於祭酒嶺金吾山之原與伯父同
穴先考祔右從先志也墓向丈尺載於譜不複書先考例

勅授登仕郎候選直隸州分州娶吾母沈孺人例 封孺人
贈文林郎諱亨謀公女子四存仁閩縣優行廩生娶張氏醇
仁娶張氏遇晨縣庠生娶郭氏溥仁未聘女子子一壻曰王
暉如孫二人伯偉仲韓均存仁出女孫二人長許字己亥科
舉人林昌彝之長子慶炳次未字均存仁出時葬畢修家譜
謹書大畧以俟當代之蓄道德而能文章者備採擇焉道光
庚子冬十月不孝孤子存仁泣述

本色之文煩而不縟質有其文不容增減

辛丑二月高
雨農先生許

同治五年以存仁官甘肅花翎知府銜蒙

恩賞給四品封典祖父母本生祖父母贈如其官先考誥贈

朝議大夫先妣沈贈恭人歸田後不能家食仍友

教四方距先考棄養忽忽已六十年而孤兒亦衰老矣哀

感曷極

光緒二年丁丑存仁謹記於道南書院